

BOSNA I HERCEGOVINA  
CENTRALNA IZBORNA KOMISIJA  
SREDIŠNJE IZBORNO POVJERENSTVO



БОСНА И ХЕРЦЕГОВИНА  
ЦЕНТРАЛНА ИЗБОРНА КОМИСИЈА

**UPUTSTVO  
O POSTUPKU PROVOĐENJA POSREDNIH IZBORA  
ZA ORGANE VLASTI U BOSNI I HERCEGOVINI OBUHVAĆENIH  
IZBORNIM ZAKONOM BOSNE I HERCEGOVINE**

Sarajevo, maj 2026. godine

Na osnovu člana 2.9 stav (1) tačke 2, 6, 10. i 12, a u vezi s članovima od 9.12 do 9.12i, od 10.10 do 10.18, od 11.10 do 11.16 i od 13.10 do 13.12, Izbornog zakona Bosne i Hercegovine (“Službeni glasnik BiH”, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 29. sjednici, održanoj 06.05.2026. godine, donijela

**UPUTSTVO  
O POSTUPKU PROVOĐENJA POSREDNIH IZBORA ZA ORGANE VLASTI U BOSNI  
I HERCEGOVINI OBUHVAĆENIH IZBORNIM ZAKONOM BOSNE I  
HERCEGOVINE**

**POGLAVLJE I. UVODNE NAPOMENE**

**Član 1.  
(Predmet)**

(1) Uputstvom o postupku provođenja posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine (u daljem tekstu: Uputstvo) uređuju se način i postupak nominiranja, provjere kandidata, ovjera kandidatskih listi, izbor, utvrđivanje rezultata glasanja, potvrđivanje rezultata glasanja i izdavanje uvjerenja licima koja su dobila mandat u:

- a) Domu naroda Parlamentarne skupštine Bosne i Hercegovine (u daljem tekstu: Dom naroda Parlamentarne skupštine BiH),
- b) Domu naroda Parlamenta Federacije Bosne i Hercegovine (u daljem tekstu: Dom naroda Parlamenta Federacije BiH),
- c) Vijeću naroda Republike Srpske (u daljem tekstu: Vijeće naroda RS) i
- d) Gradskom vijeću Grada Sarajeva i Skupštini Grada Istočnog Sarajeva.

(2) Ovim Uputstvom uređuju se način i postupak provjere kandidata, ovjera kandidatskih listi i izdavanje uvjerenja licima koja su dobila mandat predsjednika i potpredsjednika Federacije Bosne i Hercegovine te način i postupak provjere kandidata i ovjera kandidatskih listi za gradonačelnika Grada Sarajeva.

**POGLAVLJE II. DOM NARODA PARLAMENTARNE SKUPŠTINE BiH**

**Odjeljak A. Nominiranje kandidata**

**Član 2.  
(Nominiranje kandidata iz Doma naroda Parlamenta Federacije BiH – član 9.12 stav (2)  
Izbornog zakona BiH)**

(1) Delegati iz reda bošnjačkog i hrvatskog naroda u Domu naroda Parlamenta Federacije BiH biraju delegate iz svog konstitutivnog naroda.

(2) Svaki politički subjekt koji je zastupljen u bošnjačkom odnosno hrvatskom klubu ili svaki delegat iz bošnjačkog odnosno hrvatskog kluba u Domu naroda Parlamenta Federacije BiH imaju pravo nominirati jednog ili više kandidata na listi za izbor bošnjačkih odnosno hrvatskih delegata u Dom naroda Parlamentarne skupštine BiH.

### **Član 3.**

#### **(Nominiranje kandidata iz Narodne skupštine RS – članovi 9.12e, 9.12a stavovi (4) i (5) Izbornog zakona BiH)**

(1) Svaki politički subjekt ili svaki poslanik u Narodnoj skupštini Republike Srpske (u daljem tekstu: Narodna skupština RS) imaju pravo nominirati jednog ili više kandidata na listi za izbor srpskog delegata u Dom naroda Parlamentarne skupštine BiH.

(2) Delegate u Dom naroda Parlamentarne skupštine BiH (pet Srba) iz Republike Srpske bira Narodna skupština RS. Svi poslanici u Narodnoj skupštini RS imaju pravo učestvovati u postupku izbora delegata u Dom naroda Parlamentarne skupštine BiH iz Republike Srpske.

### **Član 4.**

#### **(Broj kandidata na listi – član 9.12e Izbornog zakona BiH)**

Lista iz članova 2. i 3. ovog Uputstva može sadržavati više kandidata od broja delegata koji se biraju u Dom naroda Parlamentarne skupštine BiH.

### **Član 5.**

#### **(Način podnošenja kandidatskih listi)**

Kandidatske liste iz članova 2. i 3. ovog Uputstva dostavljaju se Centralnoj izbornoj komisiji Bosne i Hercegovine (u daljem tekstu: Centralna izborna komisija BiH) na ovjeru putem Doma naroda Parlamenta Federacije BiH, odnosno Narodne skupštine RS na obrascu čiji izgled utvrđuje Centralna izborna komisija BiH, a koji je sastavni dio ovog Uputstva.

### **Član 6.**

#### **(Izjava o prihvatanju kandidature)**

Uz kandidatske liste iz člana 5. ovog Uputstva obavezno se dostavlja i izjava kandidata o prihvatanju kandidature, svojeručno potpisana i ovjerena na način propisan zakonom, na obrascu čiji izgled utvrđuje Centralna izborna komisija BiH, a koji je sastavni dio ovog Uputstva. Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

### **Član 7.**

#### **(Dostavljanje obrazaca)**

Obrasce iz članova 5. i 6. ovog Uputstva Centralna izborna komisija BiH pravovremeno dostavlja Domu naroda Parlamenta Federacije BiH i Narodnoj skupštini RS.

## **Odjeljak B. Ovjera kandidatskih listi**

### **Član 8.**

#### **(Postupak ovjere kandidatskih listi)**

(1) Centralna izborna komisija BiH nakon prijema kandidatskih listi iz članova 2. i 3. ovog Uputstva, nakon ovjere kandidatske liste, najkasnije u roku od 24 sata dostavlja odluku o ovjeri Domu naroda Parlamenta Federacije BiH, odnosno Narodnoj skupštini RS.

(2) U slučaju da se na listi iz stava (1) ovog člana pojavi ime lica koje je ovjereno kao kandidat na neposrednim izborima u istom izbornom ciklusu, Centralna izborna komisija BiH provjerava navode kako bi ustanovila je li izjašnjenje o pripadnosti konstitutivnom narodu ili grupi ostalih tog kandidata identično izjašnjenju prilikom ovjere za neposredne izbore, u istom izbornom ciklusu.

(3) U slučaju da izjašnjenje kandidata o pripadnosti konstitutivnom narodu ili grupi ostalih nije identično izjašnjenju koje je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti kandidata na listi.

### **Član 9.**

#### **(Mjere za otklanjanje nepravilnosti)**

Ukoliko se utvrdi da je kandidatska lista nepotpuna, odnosno da ne sadrži puni naziv političkog subjekta ili prezime i ime delegata koji vrši predlaganje, ime i prezime i jedinstveni matični broj nominiranog kandidata ili da kandidatska lista nije podnesena na propisanom obrascu, Centralna izborna komisija BiH će o tome odmah obavijestiti Dom naroda Parlamenta Federacije BiH, odnosno Narodnu skupštinu RS, koji su dužni najkasnije u roku od 48 sati od prijema obavještenja od Centralne izborne komisije BiH izvršiti potrebne ispravke ili dopune.

### **Član 10.**

#### **(Odbijanje kandidatske liste)**

Ukoliko se ispravke ili dopune ne izvrše u roku utvrđenom u članu 9. ovog Uputstva, Centralna izborna komisija BiH će odbiti kandidatsku listu.

### **Član 11.**

#### **(Potpisivanje obrazaca)**

Obrasce iz člana 5. ovog Uputstva potpisuje predsjednik političkog subjekta, odnosno delegat ili poslanik koji vrši nominiranje kandidata.

## **Odjeljak C. Izbor**

### **Član 12.**

#### **(Način glasanja – članovi 9.12d i 9.12f Izbornog zakona BiH)**

(1) Svaki delegat bošnjačkog, odnosno hrvatskog kluba u Domu naroda Parlamenta Federacije BiH daje jedan glas za kandidatsku listu za izbor bošnjačkih, odnosno hrvatskih delegata u Dom naroda Parlamentarne skupštine BiH.

(2) Svaki poslanik u Narodnoj skupštini RS daje jedan glas za kandidatsku listu za izbor srpskog delegata u Dom naroda Parlamentarne skupštine BiH iz Republike Srpske.

(3) Glasanje se provodi tajno, u skladu s odredbama Izbornog zakona BiH i ovog Uputstva.

### **Član 13. (Glasački listić)**

(1) Glasanje iz člana 12. ovog Uputstva vrši se na glasačkom listiću čiji izgled i sadržaj utvrđuje Centralna izborna komisija BiH, a koji je sastavni dio ovog Uputstva.

(2) Ukoliko je, na način propisan članovima 2. i 3. ovog Uputstva, predloženo više kandidatskih listi, redosljed na glasačkom listiću utvrđuje Dom naroda Parlamenta Federacije BiH i Narodna skupština RS žrijebanjem.

### **Član 14. (Provođenje izbora)**

Izbore u smislu člana 12. ovog Uputstva provode organi nadležni za provođenje izbora.

## **Odjeljak D. Utvrđivanje, potvrđivanje rezultata izbora i raspodjela mandata**

### **Član 15. (Rok za dostavljanje izbornog materijala)**

Kompletan izborni materijal s rezultatima glasanja iz člana 12. ovog Uputstva dostavlja se Centralnoj izornoj komisiji BiH odmah nakon provedenog postupka glasanja, a najkasnije u roku od 24 sata.

### **Član 16. (Utvrđivanje rezultata izbora)**

U postupku utvrđivanja rezultata izbora, Centralna izborna komisija BiH će utvrditi je li cjelokupni postupak glasanja i izbora proveden u skladu s Izbornim zakonom BiH i ovim Uputstvom te će utvrditi rezultate izbora.

### **Član 17. (Potvrđivanje rezultata izbora i raspodjela mandata)**

(1) Nakon isteka roka za podnošenje žalbi na odluku o utvrđivanju rezultata glasanja, odnosno nakon pravosnažnosti odluke, Centralna izborna komisija BiH će potvrditi rezultate glasanja i dodijeliti mandate u skladu s članom 9.5 Izbornog zakona BiH.

(2) U slučaju povrede postupka propisanog Odjeljkom C. Poglavlja II. ovog Uputstva, Centralna izborna komisija BiH će poništiti izbore i narediti ponavljanje procedure izbora delegata u onom dijelu postupka izbora gdje su povrede učinjene.

(3) Centralna izborna komisija BiH nakon isteka roka za žalbu na odluku o poništavanju izbora, odnosno nakon pravosnažnosti odluke o poništavanju izbora, odmah će, a najkasnije u roku od tri dana, narediti ponavljanje procedure izbora delegata u onom dijelu postupka izbora gdje su povrede učinjene.

#### **Član 18.** **(Zaštita izbornog prava)**

U slučajevima prigovora na postupke kandidiranja, ovjere, potvrđivanja i raspodjele mandata u Domu naroda Parlamentarne skupštine BiH, primjenjuju se opća pravila zaštite izbornog prava utvrđena u Poglavlju 6. Izbornog zakona BiH i podzakonskim aktima Centralne izborne komisije BiH.

#### **Član 19.** **(Obavještenje o rezultatima glasanja)**

O rezultatima glasanja i izabranom sazivu Doma naroda Parlamentarne skupštine BiH Centralna izborna komisija BiH obavještava izabrane delegate, Dom naroda Parlamentarne skupštine BiH, Dom naroda Parlamenta Federacije BiH, odnosno Narodnu skupštinu RS.

#### **Član 20.** **(Objavljivanje u službenim glasilima i uvjerenje o dodjeli mandata – član 2.9 stav (1) tačke 10. i 12. Izbornog zakona BiH)**

(1) Centralna izborna komisija BiH objavljuje u službenim glasilima rezultate izbora za Dom naroda Parlamentarne skupštine BiH.

(2) Izabranom delegatu u Domu naroda Parlamentarne skupštine BiH Centralna izborna komisija BiH izdaje uvjerenje o dodjeli mandata, čiji izgled i sadržaj utvrđuje Centralna izborna komisija BiH, a koji je sastavni dio ovog Uputstva.

### **POGLAVLJE III. DOM NARODA PARLAMENTA FEDERACIJE BOSNE I HERCEGOVINE**

#### **Odjeljak A. Nominiranje kandidata i izbor delegata**

#### **Član 21.** **(Nominiranje kandidata iz kantonalnih skupština i izbor delegata – članovi 10.11 stavovi (1) i (2) i 10.12 Izbornog zakona BiH)**

(1) Svaki politički subjekt koji je zastupljen u odgovarajućim klubovima konstitutivnih naroda i ostalih u svakom od deset kantona u Federaciji BiH ili svaki član jednoga od tih klubova imaju

pravo nominirati jednog ili više kandidata na listi za izbor delegata tog određenog kluba iz tog kantona.

(2) Poslanici iz reda bošnjačkog, hrvatskog, srpskog naroda i iz reda ostalih u skupštini kantona biraju delegate iz svog konstitutivnog naroda i iz reda ostalih u tom kantonu. Svakom konstitutivnom narodu i grupi ostalih daje se jedno mjesto u svakom kantonu koji ima najmanje jednog takvog poslanika u svom zakonodavnom organu, s tim da će se u slučaju da kanton nema jednog takvog poslanika u svom zakonodavnom organu primijeniti član 10.16 Izbornog zakona BiH.

(3) Ovim Uputstvom utvrđuje se preliminarni broj delegata koji se bira iz reda izabраниh poslanika skupština kantona, kako slijedi:

- a) iz zakonodavnog organa kantona br. 1, Unsko-sanski kanton, bira se osam delegata, uključujući tri iz reda bošnjačkog, jednog iz reda hrvatskog, tri iz reda srpskog naroda i jednog iz reda ostalih;
- b) iz zakonodavnog organa kantona br. 2, Posavski kanton, biraju se četiri delegata, uključujući jednog iz reda bošnjačkog, jednog iz reda hrvatskog, jednog iz reda srpskog naroda i jednog iz reda ostalih;
- c) iz zakonodavnog organa kantona br. 3, Tuzlanski kanton, bira se deset delegata, uključujući pet iz reda bošnjačkog, jednog iz reda hrvatskog, tri iz reda srpskog naroda i jednog iz reda ostalih;
- d) iz zakonodavnog organa kantona br. 4, Zeničko-dobojski kanton, bira se devet delegata, uključujući četiri iz reda bošnjačkog, dva iz reda hrvatskog, dva iz reda srpskog naroda i jednog iz reda ostalih;
- e) iz zakonodavnog organa kantona br. 5, Bosansko-podrinjski kanton – Goražde, biraju se četiri delegata, uključujući jednog iz reda bošnjačkog, jednog iz reda hrvatskog, jednog iz reda srpskog naroda i jednog iz reda ostalih;
- f) iz zakonodavnog organa kantona br. 6, Srednjobosanski kanton, bira se osam delegata, uključujući dva iz reda bošnjačkog, četiri iz reda hrvatskog, jednog iz reda srpskog naroda i jednog iz reda ostalih;
- g) iz zakonodavnog organa kantona br. 7, Hercegovačko-neretvanski kanton, bira se devet delegata, uključujući jednog iz reda bošnjačkog, pet iz reda hrvatskog, dva iz reda srpskog naroda i jednog iz reda ostalih;
- h) iz zakonodavnog organa kantona br. 8, Zapadnohercegovački kanton, bira se sedam delegata, uključujući jednog iz reda bošnjačkog, četiri iz reda hrvatskog, jednog iz reda srpskog naroda i jednog iz reda ostalih;
- i) iz zakonodavnog organa kantona br. 9, Kanton Sarajevo, bira se dvanaest delegata, uključujući četir iz reda bošnjačkog, jednog iz reda hrvatskog, pet iz reda srpskog naroda i dva iz reda ostalih i
- j) iz zakonodavnog organa kantona br. 10, Kanton 10, bira se devet delegata, uključujući jednog iz reda bošnjačkog, tri iz reda hrvatskog, četiri iz reda srpskog naroda i jednog iz reda ostalih.

## **Član 22.**

### **(Dostavljanje kandidatskih listi iz kantonalnih skupština na ovjeru i dodjela mandata – članovi 10.11 stavovi (2) i (3) i 10.16 Izbornog zakona BiH)**

(1) Poslanici iz reda bošnjačkog, hrvatskog, srpskog naroda i iz reda ostalih u zakonodavnom organu svakog kantona dostavljaju kandidatske liste na ovjeru Centralnoj izbornoj komisiji BiH i nakon ovjere tih lista provode izbore iz reda konstitutivnih naroda i iz reda ostalih te rezultate glasanja dostavljaju Centralnoj izbornoj komisiji BiH.

(2) Konačna dodjela mandata vrši se prvo u kantonima kod kojih je preliminarno utvrđen broj delegata iz člana 21. stav (3) ovog Uputstva, a ukoliko se ne izabere preliminarno utvrđen broj delegata u tom kantonu, raspodjelu preostalog broja delegata izvršit će Centralna izborna komisija BiH u skladu s članom 10.16 Izbornog zakona BiH.

## **Član 23.**

### **(Broj kandidata na listi – član 10.11 stav (3) Izbornog zakona BiH)**

Lista iz članova 21. i 22. ovog Uputstva može sadržavati više kandidata od broja delegata koji se biraju, pod uvjetom da zakonodavni organ kantona ima veći broj delegata iz reda bošnjačkog, hrvatskog, srpskog naroda i iz reda ostalih od broja delegata iz reda bošnjačkog, hrvatskog, srpskog naroda i iz reda ostalih koji se biraju u Dom naroda Parlamenta Federacije BiH.

## **Član 24.**

### **(Način podnošenja kandidatskih listi)**

Kandidatske liste iz članova 21, 22. i 23. ovog Uputstva dostavljaju se Centralnoj izbornoj komisiji BiH putem kantonalne skupštine na ovjeru, na obrascu čiji izgled utvrđuje Centralna izborna komisija BiH, a koji je sastavni dio ovog Uputstva.

## **Član 25.**

### **(Izjava o prihvatanju kandidature)**

Uz kandidatske liste iz članova 23. i 24. ovog Uputstva obavezno se dostavlja i izjava kandidata o prihvatanju kandidature, svojeručno potpisana i ovjerena na način propisan zakonom, na obrascu čiji izgled utvrđuje Centralna izborna komisija BiH, a koji je sastavni dio ovog Uputstva. Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

## **Član 26.**

### **(Dostavljanje obrazaca)**

Obrasce iz članova 24. i 25. ovog Uputstva Centralna izborna komisija BiH pravovremeno dostavlja kantonalnim skupštinama.

## **Odjeljak B. Ovjera kandidatskih listi**

### **Član 27.**

#### **(Postupak ovjere kandidatskih listi)**

(1) Centralna izborna komisija BiH nakon prijema kandidatskih listi iz članova 23. i 24. ovog Uputstva, nakon ovjere kandidatske liste, najkasnije u roku od 24 sata dostavlja odluku o ovjeri kantonalnim skupštinama.

(2) U slučaju da se na listi iz stava (1) ovog člana pojavi ime lica koje je ovjereno kao kandidat na neposrednim izborima u istom izbornom ciklusu, Centralna izborna komisija BiH provjerava navode kako bi ustanovila je li izjašnjenje o pripadnosti konstitutivnom narodu ili grupi ostalih tog kandidata identično izjašnjenju prilikom ovjere za neposredne izbore, u istom izbornom ciklusu.

(3) U slučaju da izjašnjenje kandidata o pripadnosti konstitutivnom narodu ili grupi ostalih nije identično izjašnjenju koje je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti kandidata na listi.

### **Član 28.**

#### **(Mjere za otklanjanje nepravilnosti)**

Ukoliko se utvrdi da je kandidatska lista nepotpuna, odnosno da ne sadrži puni naziv političkog subjekta ili prezime i ime člana kluba koji vrši predlaganje, ime i prezime i jedinstveni matični broj nominiranog kandidata ili da kandidatska lista nije podnesena na propisanom obrascu, Centralna izborna komisija BiH će o tome odmah obavijestiti kantonalnu skupštinu koja je dostavila listu i koja je dužna najkasnije u roku od 48 sati od prijema obavještenja od Centralne izborne komisije BiH izvršiti potrebne ispravke ili dopune.

### **Član 29.**

#### **(Odbijanje kandidatske liste)**

Ukoliko se ispravke ili dopune ne izvrše u roku utvrđenom u članu 28. ovog Uputstva, Centralna izborna komisija BiH će odbiti kandidatsku listu.

### **Član 30.**

#### **(Potpisivanje obrazaca)**

Liste iz članova 21, 22. i 23. ovog Uputstva potpisuje predsjednik političkog subjekta, odnosno delegat ili poslanik koji vrši nominiranje kandidata.

## **Odjeljak C. Izbor**

### **Član 31.**

#### **(Način glasanja – član 10.14 Izbornog zakona BiH)**

(1) Svaki delegat u kantonalnoj skupštini daje jedan glas za listu na kojoj je njegov odgovarajući klub.

(2) Izbor se vrši tajnim glasanjem.

**Član 32.**  
**(Provođenje izbora)**

Izbore u smislu člana 31. ovog Uputstva provode organi nadležni za provođenje izbora.

**Član 33.**  
**(Glasački listić)**

(1) Glasanje iz člana 31. ovog Uputstva vrši se na glasačkom listiću čiji izgled i sadržaj utvrđuje Centralna izborna komisija BiH.

(2) Ukoliko ima više kandidatskih listi, redoslijed kandidatskih listi na glasačkom listiću utvrđuje kantonalna skupština žrijebanjem.

**Odjeljak D. Utvrđivanje, potvrđivanje rezultata izbora i raspodjela mandata**

**Član 34.**  
**(Rok za dostavljanje izbornog materijala)**

Kompletan izborni materijal s rezultatima glasanja iz člana 31. ovog Uputstva dostavlja se Centralnoj izbornoj komisiji BiH odmah nakon provedenog postupka glasanja, a najkasnije u roku od 24 sata.

**Član 35.**  
**(Utvrđivanje rezultata izbora)**

U postupku utvrđivanja rezultata izbora, Centralna izborna komisija BiH utvrdit će je li cjelokupni postupak glasanja i izbora proveden u skladu s Izbornim zakonom BiH i ovim Uputstvom te će utvrditi rezultate izbora.

**Član 36.**  
**(Potvrđivanje rezultata izbora i raspodjela mandata)**

(1) Nakon isteka roka za podnošenje žalbe na odluku o utvrđivanju rezultata glasanja, odnosno nakon pravosnažnosti odluke o utvrđivanju rezultata glasanja, Centralna izborna komisija BiH će potvrditi rezultate glasanja i dodijeliti mandate u skladu s članom 9.5 Izbornog zakona BiH.

(2) U slučaju povrede postupka propisanog Odjeljkom C. Poglavlja III. ovog Uputstva, Centralna izborna komisija BiH će poništiti izbore i odmah, a najkasnije u roku od tri dana, narediti ponavljanje procedure izbora delegata u onom dijelu postupka izbora gdje su povrede učinjene.

(3) Mandati se raspodjeljuju prema formuli utvrđenoj u članu 9.5 Izbornog zakona BiH i u skladu s postupkom utvrđenim članom 10.16 Izbornog zakona BiH.

**Član 37.**  
**(Zaštita izbornog prava)**

U slučajevima prigovora na postupke kandidiranja, ovjere, potvrđivanja i raspodjele mandata u Domu naroda Parlamenta Federacije BiH, primjenjuju se opća pravila zaštite izbornog prava utvrđena u Poglavlju 6. Izbornog zakona BiH i podzakonskim aktima Centralne izborne komisije BiH.

**Član 38.**  
**(Postupak popunjavanja upražnjenog mjesta u Domu naroda Parlamenta Federacije BiH – preraspodjela mandata)**

(1) U slučaju da se ne izabere potreban broj delegata koji se bira u Dom naroda Parlamenta Federacije BiH iz reda svakog konstitutivnog naroda i iz reda ostalih, nakon provedene preraspodjele mandata u skladu s članom 10.16 Izbornog zakona BiH, a u kantonalnim skupštinama ima poslanika iz reda nedostajućeg konstitutivnog naroda i iz reda ostalih koji su učestvovali u postupku izbora za Dom naroda Parlamenta Federacije BiH, odnosno koji nisu izabrani u Dom naroda Parlamenta Federacije BiH, Centralna izborna komisija BiH vrši preraspodjelu tog mjesta neizabranom kandidatu koji ima najviši količnik na svim listama političkih subjekata.

(2) U slučaju da na način propisan u stavu (1) ovog člana neko mjesto i dalje ostane upražnjeno, Centralna izborna komisija BiH će dostaviti obavještenje kantonalnim skupštinama koje imaju poslanika iz reda nedostajućeg konstitutivnog naroda i iz reda ostalih koji nisu učestvovali u postupku izbora za Dom naroda Parlamenta Federacije BiH, odnosno koji nisu izabrani u Dom naroda Parlamenta Federacije BiH.

(3) Kantonalne skupštine su dužne u roku od 48 sati od prijema obavještenja iz stava (1) ovog člana upoznati svakog političkog subjekta i svakog člana kluba iz reda ostalih s dostavljenim obavještenjem te omogućiti ovlaštenim predlagачima da predlože liste kandidata te provedu posredne izbore u skladu s ovim Uputstvom.

(4) Izuzetno, ukoliko nakon procedure utvrđene u stavovima (1), (2) i (3) ovog člana nedostaje određeni broj delegata jednog iz reda konstitutivnog naroda ili iz reda ostalih (član 10.10 Izbornog zakona BiH), Centralna izborna komisija BiH će posebnim aktom propisati način popune i izvršiti popunu nedostajućeg broja delegate iz reda konstitutivnog naroda ili iz reda ostalih primjenom člana 10.16 Izbornog zakona BiH.

**Član 39.**  
**(Obavještenje o rezultatima glasanja)**

O rezultatima glasanja i izabranom sazivu Doma naroda Parlamenta Federacije BiH Centralna izborna komisija BiH obavještava izabrane delegate, Dom naroda Parlamenta Federacije BiH i kantonalne skupštine.

#### **Član 40.**

**(Objavljivanje u službenim glasilima i uvjerenje o dodjeli mandata – član 2.9 stav (1) tačke 10. i 12. Izbornog zakona BiH)**

(1) Centralna izborna komisija BiH objavljuje u službenim glasilima rezultate izbora za Dom naroda Parlamenta Federacije BiH.

(2) Izabranom delegatu u Domu naroda Parlamenta Federacije BiH Centralna izborna komisija BiH izdaje uvjerenje o dodjeli mandata, čiji izgled i sadržaj utvrđuje Centralna izborna komisija BiH, a koji je sastavni dio ovog Uputstva.

### **POGLAVLJE IV. VIJEĆE NARODA REPUBLIKE SRPSKE**

#### **Odjeljak A. Nominiranje kandidata**

#### **Član 41.**

**(Nominiranje kandidata iz klubova poslanika u Narodnoj skupštini RS – članovi 11.11 stav (1) i 11.12 stav (2) Izbornog zakona BiH)**

(1) Delegate Vijeća naroda RS bira odgovarajući klub poslanika u Narodnoj skupštini RS.

(2) Svaki politički subjekt zastupljen u klubovima poslanika odgovarajućih konstitutivnih naroda i ostalih ili svaki član jednog od ovih klubova poslanika, uključujući i *ad hoc* članove izabrane u skladu s članom 11.12 Izbornog zakona BiH, imaju pravo predložiti jednog ili više kandidata na listi za izbor delegata tog relevantnog kluba delegata.

#### **Član 42.**

**(Broj kandidata na listi – član 11.12 stav (2) Izbornog zakona BiH)**

Lista iz člana 41. ovog Uputstva može sadržavati više kandidata od broja delegata koji se biraju u Vijeće naroda RS.

#### **Član 43.**

**(Način podnošenja kandidatskih listi)**

Kandidatske liste iz člana 41. ovog Uputstva dostavljaju se Centralnoj izbornoj komisiji BiH na ovjeru na obrascu čiji izgled utvrđuje Centralna izborna komisija BiH, a koji je sastavni dio ovog Uputstva.

#### **Član 44.**

**(Izjava o prihvatanju kandidature)**

Uz kandidatske liste iz članova 42. i 43. ovog Uputstva obavezno se dostavlja i izjava kandidata o prihvatanju kandidature, svojeručno potpisana i ovjerena na način propisan zakonom, na obrascu čiji izgled utvrđuje Centralna izborna komisija BiH, a koji je sastavni dio ovog Uputstva. Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

**Član 45.**  
**(Dostavljanje obrazaca)**

Obrasce iz članova 43. i 44. ovog Uputstva Centralna izborna komisija BiH pravovremeno dostavlja Narodnoj skupštini RS.

**Odjeljak B. Ovjera kandidatskih listi**

**Član 46.**  
**(Postupak ovjere kandidatskih listi)**

(1) Centralna izborna komisija BiH nakon prijema kandidatskih listi iz članova 41. i 42. ovog Uputstva, nakon ovjere kandidatske liste, najkasnije u roku od 24 sata dostavlja odluku o ovjeri odgovarajućem klubu poslanika u Narodnoj skupštini RS.

(2) U slučaju da se na listi iz stava (1) ovog člana pojavi ime lica koje je ovjereno kao kandidat na neposrednim izborima u istom izbornom ciklusu, Centralna izborna komisija BiH provjerava navode kako bi ustanovila je li izjašnjenje o pripadnosti konstitutivnom narodu ili grupi ostalih tog kandidata identično izjašnjenju prilikom ovjere za neposredne izbore, u istom izbornom ciklusu.

(3) U slučaju da izjašnjenje kandidata o pripadnosti konstitutivnom narodu ili grupi ostalih nije identično izjašnjenju koje je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti kandidata na listi.

**Član 47.**  
**(Mjere za otklanjanje nepravilnosti)**

Ukoliko se utvrdi da je kandidatska lista nepotpuna, odnosno da ne sadrži puni naziv političkog subjekta ili prezime i ime poslanika koji vrši predlaganje, ime i prezime i jedinstveni matični broj nominiranog kandidata ili da kandidatska lista nije podnesena na propisanom obrascu, Centralna izborna komisija BiH će o tome odmah obavijestiti Narodnu skupštinu RS, koja je dužna najkasnije u roku od 48 sati od prijema obavještenja od Centralne izborne komisije BiH izvršiti potrebne ispravke ili dopune.

**Član 48.**  
**(Odbijanje kandidatske liste)**

Ukoliko se ispravke ili dopune ne izvrše u roku utvrđenom u članu 47. ovog Uputstva, Centralna izborna komisija BiH će odbiti kandidatsku listu.

**Član 49.**  
**(Potpisivanje obrazaca)**

Obrasce iz člana 43. ovog Uputstva potpisuje predsjednik političkog subjekta, odnosno poslanik koji vrši nominiranje kandidata.

## **Odjeljak C. Izbor**

### **Član 50.**

#### **(Način glasanja – član 11.12 stavovi (4) i (5) Izbornog zakona BiH)**

- (1) Poslanik u Narodnoj skupštini RS jednom glasa za listu unutar svog kluba delegata.
- (2) Glasanje se provodi tajnim glasanjem.

### **Član 51.**

#### **(Glasački listić)**

- (1) Glasanje iz člana 50. ovog Uputstva vrši se na glasačkom listiću čiji izgled i sadržaj utvrđuje Centralna izborna komisija BiH, a koji je sastavni dio ovog Uputstva.
- (2) Ukoliko ima više kandidatskih listi, redosljed kandidatskih listi na glasačkom listiću utvrđuje Narodna skupština RS žrijebanjem.

### **Član 52.**

#### **(Provođenje izbora)**

Izbore u smislu člana 50. ovog Uputstva provodi organ nadležan za provođenje izbora.

## **Odjeljak D. Utvrđivanje, potvrđivanje rezultata izbora i raspodjela mandata**

### **Član 53.**

#### **(Rok za dostavljanje izbornog materijala)**

Kompletan izborni materijal s rezultatima glasanja iz člana 50. ovog Uputstva dostavlja se Centralnoj izbornoj komisiji BiH odmah nakon provedenog postupka glasanja, a najkasnije u roku od 24 sata.

### **Član 54.**

#### **(Utvrđivanje rezultata izbora)**

U postupku utvrđivanja rezultata izbora, Centralna izborna komisija BiH će utvrditi je li cjelokupni postupak glasanja i izbora proveden u skladu s Izbornim zakonom BiH i ovim Uputstvom te će utvrditi rezultate izbora.

### **Član 55.**

#### **(Potvrđivanje rezultata izbora i raspodjela mandata)**

- (1) Nakon isteka roka za podnošenje žalbi na odluku o utvrđivanju rezultata glasanja, odnosno nakon pravosnažnosti odluke, Centralna izborna komisija BiH će potvrditi rezultate glasanja i dodijeliti mandate u skladu s članom 9.5 Izbornog zakona BiH.

(2) U slučaju povrede postupka propisanog Odjeljkom C. Poglavlja IV. ovog Uputstva, Centralna izborna komisija BiH će poništiti izbore i narediti ponavljanje procedure izbora delegata u onom dijelu postupka izbora gdje su povrede učinjene.

(3) Centralna izborna komisija BiH će, nakon isteka roka za žalbu na odluku o poništavanju izbora, odnosno nakon pravosnažnosti odluke o poništavanju izbora, odmah, a najkasnije u roku od tri dana, narediti ponavljanje procedure izbora delegata u onom dijelu postupka izbora gdje su povrede učinjene.

#### **Član 56.** **(Zaštita izbornog prava)**

U slučajevima prigovora na postupke kandidiranja, ovjere, potvrđivanja i raspodjele mandata u Vijeću naroda RS, primjenjuju se opća pravila zaštite izbornog prava utvrđena u Poglavlju 6. Izbornog zakona BiH i podzakonskim aktima Centralne izborne komisije BiH.

#### **Član 57.** **(Obavještenje o rezultatima glasanja)**

O rezultatima glasanja i izabranom sazivu Vijeća naroda RS Centralna izborna komisija BiH obavještava izabrane delegate, Vijeće naroda RS, odnosno Narodnu skupštinu RS.

#### **Član 58.** **(Objavljivanje u službenim glasilima i uvjerenje o dodjeli mandata – član 2.9 stav (1) tačke 10. i 12. Izbornog zakona BiH)**

(1) Centralna izborna komisija BiH objavljuje u službenim glasilima rezultate izbora za Vijeće naroda RS.

(2) Izabranom delegatu u Vijeću naroda RS Centralna izborna komisija BiH izdaje uvjerenje o dodjeli mandata, čiji izgled i sadržaj utvrđuje Centralna izborna komisija BiH, a koji je sastavni dio ovog Uputstva.

### **POGLAVLJE V. PREDsjedNIK I POTpredsjedNICI FEDERACIJE BOSNE I HERCEGOVINE**

#### **Odjeljak A. Provjere kandidata**

#### **Član 59.** **(Dostavljanje imena kandidata na provjere)**

Dom naroda Parlamenta Federacije Bosne i Hercegovine dostavlja Centralnoj izbornoj komisiji BiH imena kandidata za predsjednika i dva potpredsjednika Federacije Bosne i Hercegovine (u daljem tekstu: predsjednik i potpredsjednik Federacije BiH) iz člana 9.13 Izbornog zakona BiH, na obrascima koji su sastavni dio ovog Uputstva, na provjeru ispunjavaju li uvjete iz članova 1.6, 1.7, 1.7a, 1.8, 1.10 stav (1) tačka 5) i člana 4.2 Izbornog zakona BiH za kandidiranje za predsjednika i dva potpredsjednika Federacije BiH (Obrasci PiP FBiH 1 i 2).

**Član 60.**  
**(Izjava o prihvatanju kandidature i dostavljanje obrasca)**

Uz imena kandidata iz člana 59. ovog Uputstva obavezno se dostavljaja izjava kandidata o prihvatanju kandidature, svojeručno potpisana i ovjerena na način propisan zakonom, na obrascu koji je sastavni dio ovog Uputstva (Obrazac PiP FBiH 3). Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

**Odjeljak B. Ovjera kandidature**

**Član 61.**  
**(Postupak ovjere)**

(1) Centralna izborna komisija BiH provjerava ispunjavaju li kandidati uvjete za kandidaturu. Nakon prijema obrazaca iz člana 59. ovog Uputstva, Centralna izborna komisija BiH vrši provjere predloženih kandidata te najkasnije u roku od 24 sata od ovjere kandidature dostavlja odluku Domu naroda Parlamenta Federacije BiH.

(2) U slučaju da je predloženi kandidat učestvovao na neposrednim izborima u istom izbornom ciklusu, Centralna izborna komisija BiH vrši provjere je li izjava o pripadnosti konstitutivnom narodu tog kandidata identična izjavi prilikom ovjere za neposredne izbore, u istom izbornom ciklusu.

(3) U slučaju da kandidati ne ispunjavaju uvjete iz stava (1) ovog člana, ili izjava kandidata iz stava (2) ovog člana o pripadnosti konstitutivnom narodu ili grupi ostalih nije identična izjavi koju je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti ovjeru kandidata.

**Član 62.**  
**(Mjere za otklanjanje nepravilnosti)**

Ukoliko se utvrdi da prijedlog grupe delegata ne sadrži sve podatke utvrđene u članu 9.13 Izbornog zakona BiH, ime i prezime i jedinstveni matični broj nominiranog kandidata ili da prijedlog kandidata nije podnesen na propisanom obrascu, Centralna izborna komisija BiH će o tome odmah obavijestiti podnosioca putem Doma naroda Parlamenta Federacije BiH, koji je dužan najkasnije u roku od 48 sati od prijema obavještenja od Centralne izborne komisije BiH izvršiti potrebne ispravke ili dopune.

**Član 63.**  
**(Odbijanje ovjere kandidata)**

Ukoliko se ispravke ili dopune ne izvrše u roku utvrđenom u članu 62. ovog Uputstva, Centralna izborna komisija BiH će odbiti ovjeru kandidata.

**Član 64.**  
**(Potpisivanje obrazaca)**

Obrazac iz člana 59. ovog Uputstva potpisuju svi delegati članovi grupe koji predlažu kandidate.

**Član 65.**  
**(Ovjera kandidatskih listi)**

Nakon što Predstavnički dom Parlamenta Federacije BiH na obrascu koji je sastavni dio ovog Uputstva (Obrazac PiP FBiH 6) dostavi Centralnoj izbornoj komisiji BiH listu ili liste kandidata iz člana 9.14 Izbornog zakona BiH, Centralna izborna komisija BiH vrši provjere i ovjerava listu ili liste u roku od 48 sati.

**Član 66.**  
**(Izbori za predsjednika i dva potpredsjednika FBiH)**

(1) Izbori za predsjednika i dva potpredsjednika Federacije BiH vrše se u skladu s odredbama članova 9.14, 9.15, 9.16, 9.17, 9.18 i 9.19 Izbornog zakona BiH.

(2) Odluka nadležnog doma Parlamenta Federacije BiH o izboru liste od tri kandidata u skladu s članovima od 9.13 do 9.18 Izbornog zakona BiH i odluka iz člana 9.19 stav (1) Izbornog zakona BiH, zajedno s kompletnim izbornim materijalom, dostavlja se Centralnoj izbornoj komisiji BiH na utvrđivanje i potvrđivanje rezultata izbora u skladu s članom 2.9 stav (1) tačka 9. Izbornog zakona BiH.

**Član 67.**  
**(Objavljivanje u službenim glasilima i uvjerenje o dodjeli mandata – član 2.9 stav (1) tačke 10. i 12. Izbornog zakona BiH)**

(1) Centralna izborna komisija BiH nakon potvrđivanja rezultata izbora objavljuje u službenim glasilima rezultate izbora za predsjednika i dva potpredsjednika Federacije BiH.

(2) Izabranom predsjedniku i potpredsjednicima Federacije BiH Centralna izborna komisija BiH uručuje uvjerenje o dodjeli mandata, na obrascima čiji izgled utvrđuje Centralna izborna komisija BiH, a koji su sastavni dio ovog Uputstva (Obrasci PiP FBiH 4 i 5).

**POGLAVLJE VI. GRADSKO VIJEĆE GRADA SARAJEVA**

**Odjeljak A. Nominiranje kandidata**

**Član 68.**  
**(Izbor članova Gradskog vijeća Grada Sarajeva)**

Izbor članova Gradskog vijeća Grada Sarajeva vrši se u skladu s Izbornim zakonom BiH i Statutom Grada Sarajeva.

**Član 69.**  
**(Način podnošenja kandidatskih listi)**

Kandidatske liste za izbor članova Gradskog vijeća Grada Sarajeva pravovremeno se dostavljaju Centralnoj izbornoj komisiji BiH na ovjeru, na obrascu koji utvrdi Centralna izborna komisija BiH, a koji je sastavni dio ovog Uputstva.

**Član 70.**  
**(Izjava o prihvatanju kandidature i dostavljanje obrazaca)**

(1) Uz kandidatske liste iz člana 69. ovog Uputstva obavezno se dostavlja izjava kandidata o prihvatanju kandidature, svojeručno potpisana i ovjerena na način propisan zakonom, na obrascu koji je sastavni dio ovog Uputstva. Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

(2) Obрасce iz člana 69. ovog Uputstva Centralna izborna komisija BiH pravovremeno dostavlja općinskim vijećima.

**Odjeljak B. Ovjera kandidatskih listi**

**Član 71.**  
**(Postupak ovjere kandidatskih listi)**

(1) Centralna izborna komisija BiH nakon prijema kandidatskih listi iz člana 69. ovog Uputstva, nakon ovjere kandidatske liste, najkasnije u roku od 24 sata dostavlja odluku o ovjeri općinskim vijećima.

(2) U slučaju da se na listi iz stava (1) ovog člana pojavi ime lica koje je ovjereno kao kandidat na neposrednim izborima u istom izbornom ciklusu, Centralna izborna komisija BiH provjerava navode kako bi ustanovila je li izjašnjenje o pripadnosti konstitutivnom narodu ili grupi ostalih tog kandidata identično izjašnjenju prilikom ovjere za neposredne izbore, u istom izbornom ciklusu.

(3) U slučaju da izjašnjenje kandidata o pripadnosti konstitutivnom narodu ili grupi ostalih nije identično izjašnjenju koje je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti kandidata na listi.

**Član 72.**  
**(Mjere za otklanjanje nepravilnosti)**

Ukoliko se utvrdi da kandidatska lista ne sadrži puni naziv političke stranke, liste nezavisnih kandidata i/ili grupe općinskih vijećnika, ime i prezime i jedinstveni matični broj nominiranog kandidata, Centralna izborna komisija BiH će o tome odmah obavijestiti općinsko vijeće koje je dužno najkasnije u roku od 48 sati od prijema obavještenja od Centralne izborne komisije BiH izvršiti potrebne ispravke ili dopune.

**Član 73.**  
**(Odbijanje kandidatske liste)**

Ukoliko se ispravke ili dopune ne izvrše u roku utvrđenom u članu 72. ovog Uputstva, Centralna izborna komisija BiH će odbiti kandidatsku listu.

**Član 74.**  
**(Potpisivanje obrazaca)**

Obrasce iz člana 69. ovog Uputstva potpisuje predlagač ili ovlašteno lice predlagača.

**Odjeljak C. Izbor**

**Član 75.**  
**(Izbor – član 13.10 stav (1) Izbornog zakona BiH)**

Izbor članova Gradskog vijeća Grada Sarajeva vrše općinska vijeća koja sačinjavaju taj grad.

**Odjeljak D. Utvrđivanje, potvrđivanje rezultata izbora i raspodjela mandata**

**Član 76.**  
**(Rok za dostavljanje izbornog materijala)**

Kompletan izborni materijal s rezultatima glasanja iz člana 75. ovog Uputstva dostavlja se Centralnoj izornoj komisiji BiH odmah nakon provedenog postupka glasanja, a najkasnije u roku od 24 sata.

**Član 77.**  
**(Utvrđivanje rezultata izbora)**

U postupku utvrđivanja rezultata glasanja, Centralna izborna komisija BiH će utvrditi je li cjelokupni postupak glasanja i izbora proveden u skladu s Izbornim zakonom BiH i ovim Uputstvom te će utvrditi rezultate izbora.

**Član 78.**  
**(Potvrđivanje rezultata izbora i raspodjela mandata)**

(1) Nakon isteka roka za podnošenje žalbi na odluku o utvrđivanju rezultata glasanja, odnosno nakon pravosnažnosti odluke, Centralna izborna komisija BiH će potvrditi rezultate glasanja i dodijeliti mandate u skladu s članom 13.5 Izbornog zakona BiH.

(2) U slučaju povrede postupka, Centralna izborna komisija BiH će poništiti izbore i narediti ponavljanje procedure izbora vijećnika u onom dijelu postupka izbora gdje su povrede učinjene.

(3) Centralna izborna komisija BiH će, nakon isteka roka za žalbu na odluku o poništavanju izbora, odnosno nakon pravosnažnosti odluke o poništavanju izbora, odmah, a najkasnije u roku od tri

dana, narediti ponavljanje procedure izbora delegata u onom dijelu postupka izbora gdje su povrede učinjene.

**Član 79.**  
**(Zaštita izbornog prava)**

U slučajevima prigovora na postupke kandidiranja, ovjere, potvrđivanja i raspodjele mandata u Gradskom vijeću Grada Sarajeva, primjenjuju se opća pravila zaštite izbornog prava utvrđena u Poglavlju 6. Izbornog zakona BiH i podzakonskim aktima Centralne izborne komisije BiH.

**Član 80.**  
**(Obavještenje o rezultatima izbora)**

O rezultatima izbora i izabranom sazivu Gradskog vijeća Grada Sarajeva Centralna izborna komisija BiH obavještava izabrane vijećnike, općinsko vijeće i Gradsko vijeće Grada Sarajeva.

**Član 81.**  
**(Objavljivanje u službenim glasilima i uvjerenje o dodjeli mandata – član 2.9 stav (1) tačke 10. i 12. Izbornog zakona BiH)**

(1) Centralna izborna komisija BiH objavljuje u službenim glasilima rezultate glasanja za Gradsko vijeće Grada Sarajeva.

(2) Izabranom gradskom vijećniku Grada Sarajeva Centralna izborna komisija BiH izdaje uvjerenje o dodjeli mandata, na obrascu čiji izgled utvrđuje Centralna izborna komisija BiH, a koji je sastavni dio ovog Uputstva.

**POGLAVLJE VII. NOMINIRANJE I PROVJERE KANDIDATA ZA GRADONAČELNIKA GRADA SARAJEVA**

**Odjeljak A. Nominiranje i provjere kandidata za gradonačelnika Grada Sarajeva**

**Član 82.**  
**(Izbor gradonačelnika – član 13.10 stav (3) Izbornog zakona BiH)**

Gradonačelnika Grada Sarajeva bira Gradsko vijeće na način utvrđen zakonom i statutom.

**Član 83.**  
**(Dostavljanje imena kandidata na provjere)**

(1) Gradsko vijeće Grada Sarajeva pravovremeno dostavlja Centralnoj izornoj komisiji BiH imena kandidata za gradonačelnika Grada Sarajeva, na obrascu koji je sastavni dio ovog Uputstva, na provjeru ispunjavaju li uvjete iz članova 1.6, 1.7, 1.7a, 1.8, 1.10 stav (1) tačka 5) i člana 4.2 Izbornog zakona BiH.

(2) Centralna izborna komisija BiH ne vrši provjere kandidata ukoliko se na kandidatskoj listi za gradonačelnika Grada Sarajeva nalazi kandidat koji je izabrani vijećnik na posljednjim lokalnim

izborima u Općini Centar Sarajevo, Općini Novi Grad Sarajevo, Općini Novo Sarajevo ili Općini Stari Grad Sarajevo.

**Član 84.**  
**(Način podnošenja kandidatskih listi)**

Kandidatske liste dostavljaju se Centralnoj izbornoj komisiji BiH na ovjeru na obrascu čiji izgled utvrđuje Centralna izborna komisija BiH, a koji je sastavni dio ovog Uputstva.

**Član 85.**  
**(Izjava o prihvatanju kandidature)**

(1) Uz kandidatske liste iz člana 84. ovog Uputstva obavezno se dostavlja izjava kandidata o prihvatanju kandidature, svojeručno potpisana i ovjerena na način propisan zakonom, na obrascu koji je sastavni dio ovog Uputstva. Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

**Odjeljak B. Ovjera kandidatskih listi**

**Član 86.**  
**(Postupak ovjere kandidatskih listi)**

(1) Centralna izborna komisija BiH nakon prijema kandidatskih listi iz člana 84. ovog Uputstva, nakon ovjere kandidatske liste, najkasnije u roku od 24 sata dostavlja odluku o ovjeri Gradskom vijeću.

(2) U slučaju da se na listi iz stava (1) ovog člana pojavi ime lica koje je ovjereno kao kandidat na neposrednim izborima u istom izbornom ciklusu, Centralna izborna komisija BiH provjerava navode kako bi ustanovila je li izjašnjenje o pripadnosti konstitutivnom narodu ili grupi ostalih tog kandidata identično izjašnjenju prilikom ovjere za neposredne izbore, u istom izbornom ciklusu.

(3) U slučaju da izjašnjenje kandidata o pripadnosti konstitutivnom narodu ili grupi ostalih nije identično izjašnjenju koje je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti kandidata na listi.

**Član 87.**  
**(Mjere za otklanjanje nepravilnosti)**

Ukoliko se utvrdi da je kandidatska lista nepotpuna, odnosno da ne sadrži ime i prezime i jedinstveni matični broj nominiranog kandidata, ili da kandidatska lista nije podnesena na propisanom obrascu, Centralna izborna komisija BiH će o tome odmah obavijestiti Gradsko vijeće koje je dužno, najkasnije u roku od 48 sati od prijema obavještenja od Centralne izborne komisije BiH, izvršiti potrebne ispravke ili dopune.

**Član 88.**  
**(Odbijanje kandidatske liste)**

Ukoliko se ispravke ili dopune ne izvrše u roku utvrđenom u članu 87. ovog Uputstva, Centralna izborna komisija BiH će odbiti kandidatsku listu.

**Član 89.**  
**(Potpisivanje obrazaca)**

Obrasce iz člana 84. ovog Uputstva potpisuje predlagač ili ovlašteno lice predlagača.

**POGLAVLJE VIII. SKUPŠTINA GRADA ISTOČNOG SARAJEVA**

**Odjeljak A. Nominiranje kandidata**

**Član 90.**  
**(Izbor članova Skupštine Grada Istočnog Sarajeva)**

Izbor članova Skupštine Grada Istočnog Sarajeva vrši se u skladu s odredbama Izbornog zakona BiH, Izbornog zakona RS i Statuta Grada Istočnog Sarajeva.

**Član 91.**  
**(Način podnošenja kandidatskih listi)**

Kandidatske liste i izjave o prihvatanju kandidature za izbor članova Skupštine Grada Istočnog Sarajeva pravovremeno se dostavljaju Centralnoj izbornoj komisiji BiH na ovjeru, na obrascu koji utvrdi Centralna izborna komisija BiH, a koji je sastavni dio ovog Uputstva.

**Član 92.**  
**(Izjava o prihvatanju kandidature)**

(1) Uz kandidatske liste iz člana 91. ovog Uputstva obavezno se dostavlja izjava kandidata o prihvatanju kandidature, svojeručno potpisana i ovjerena na način propisan zakonom, na obrascu koji je sastavni dio ovog Uputstva. Ova izjava može biti potpisana od strane kandidata i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH.

(2) Obrasce iz člana 91. ovog Uputstva Centralna izborna komisija BiH pravovremeno dostavlja skupštinama općina.

## **Odjeljak B. Ovjera kandidatskih listi**

### **Član 93. (Postupak ovjere kandidatskih listi)**

(1) Centralna izborna komisija BiH nakon prijema kandidatskih listi iz člana 91. ovog Uputstva, nakon ovjere kandidatske liste, najkasnije u roku od 24 sata dostavlja odluku o ovjeri skupštinama općina.

(2) U slučaju da se na listi iz stava (1) ovog člana pojavi ime lica koje je ovjereno kao kandidat na neposrednim izborima u istom izbornom ciklusu, Centralna izborna komisija BiH provjerava navode kako bi ustanovila je li izjašnjenje o pripadnosti konstitutivnom narodu ili grupi ostalih tog kandidata identično izjašnjenju prilikom ovjere za neposredne izbore, u istom izbornom ciklusu.

(3) U slučaju da izjašnjenje kandidata o pripadnosti konstitutivnom narodu ili grupi ostalih nije identično izjašnjenju koje je taj kandidat dao prilikom ovjere za neposredne izbore, u istom izbornom ciklusu, Centralna izborna komisija BiH će odbiti kandidata na listi.

### **Član 94. (Mjere za otklanjanje nepravilnosti)**

Ukoliko se utvrdi da kandidatska lista ne sadrži puni naziv političkog subjekta, liste nezavisnih kandidata ili grupe članova, ime i prezime i jedinstveni matični broj nominiranog kandidata, Centralna izborna komisija BiH će o tome odmah obavijestiti skupštinu općine koja je dužna, najkasnije u roku od 48 sati od prijema obavještenja od Centralne izborne komisije BiH, izvršiti potrebne ispravke ili dopune.

### **Član 95. (Odbijanje kandidatske liste)**

Ukoliko se ispravke ili dopune ne izvrše u roku utvrđenom u članu 94. ovog Uputstva, Centralna izborna komisija BiH će odbiti kandidatsku listu.

### **Član 96. (Potpisivanje obrazaca)**

Obrasce iz člana 91. ovog Uputstva potpisuje predlagač ili ovlašteno lice predlagača.

## **Odjeljak C. Izbor**

### **Član 97. (Izbor – član 13.10 stav (1) Izborni zakon BiH)**

Izbor članova Skupštine Grada Istočnog Sarajeva vrše skupštine općina koje sačinjavaju taj grad.

## **Odjeljak D. Utvrđivanje, potvrđivanje rezultata izbora i raspodjela mandata**

### **Član 98.**

#### **(Rok za dostavljanje izbornog materijala)**

Kompletan izborni materijal s rezultatima glasanja iz člana 97. ovog Uputstva dostavlja se Centralnoj izbornoj komisiji BiH odmah nakon provedenog postupka glasanja, a najkasnije u roku od 24 sata.

### **Član 99.**

#### **(Utvrđivanje rezultata izbora)**

U postupku utvrđivanja rezultata glasanja, Centralna izborna komisija BiH utvrdit će je li cjelokupni postupak glasanja i izbora proveden u skladu s Izbornim zakonom BiH i ovim Uputstvom te će utvrditi rezultate izbora.

### **Član 100.**

#### **(Potvrđivanje rezultata izbora i raspodjela mandata)**

(1) Nakon isteka roka za podnošenje žalbi na odluku o utvrđivanju rezultata glasanja, odnosno nakon pravosnažnosti odluke, Centralna izborna komisija BiH će potvrditi rezultate glasanja i dodijeliti mandate.

(2) U slučaju povrede postupka, Centralna izborna komisija BiH će poništiti izbore i narediti ponavljanje procedure izbora vijećnika u onom dijelu postupka izbora gdje su povrede učinjene.

(3) Centralna izborna komisija BiH će, nakon isteka roka za žalbu na odluku o poništavanju izbora, odnosno nakon pravosnažnosti odluke o poništavanju izbora, odmah, a najkasnije u roku od tri dana, narediti ponavljanje procedure izbora delegata u onom dijelu postupka izbora gdje su povrede učinjene.

### **Član 101.**

#### **(Zaštita izbornog prava)**

U slučajevima prigovora na postupke kandidiranja, ovjere, potvrđivanja i raspodjele mandata u Skupštini Grada Istočnog Sarajeva, primjenjuju se opća pravila zaštite izbornog prava utvrđena u Poglavlju 6. Izbornog zakona BiH i podzakonskim aktima Centralne izborne komisije BiH.

### **Član 102.**

#### **(Obavještenje o rezultatima izbora)**

O rezultatima glasanja i izabranom sazivu Skupštine Grada Istočnog Sarajeva Centralna izborna komisija BiH obavještava izabrane vijećnike, skupštine općina i Skupštinu Grada Istočnog Sarajeva.

### Član 103.

**(Objavljivanje u službenim glasilima i uvjerenje o dodjeli mandata – član 2.9 stav (1) tačke 10. i 12. Izbornog zakona BiH)**

(1) Centralna izborna komisija BiH objavljuje u službenim glasilima rezultate glasanja za Skupštinu Grada Istočnog Sarajeva.

(2) Izabranom vijećniku u Skupštini Grada Istočnog Sarajeva Centralna izborna komisija BiH izdaje uvjerenje o dodjeli mandata, na obrascu čiji izgled utvrđuje Centralna izborna komisija BiH, a koji je sastavni dio ovog Uputstva.

## IX. PRELAZNE I ZAVRŠNE ODREDBE

### Član 104.

**(Upotreba izraza u muškom i ženskom rodu)**

Riječi koje su radi preglednosti u ovom Uputstvu navedene u jednom rodu, bez diskriminacije se odnose i na muški i na ženski rod.

### Član 105.

**(Prestanak primjene)**

Stupanjem na snagu ovog Uputstva prestaje važiti Uputstvo o postupku provođenja posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine ("Službeni glasnik BiH", br. 75/22), Uputstvo o izmjenama i dopunama Uputstva o postupku provođenja posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine ("Službeni glasnik BiH", br. 83/22) i Uputstvo o dopunama Uputstva o postupku provođenja posrednih izbora za organe vlasti u Bosni i Hercegovini obuhvaćenih Izbornim zakonom Bosne i Hercegovine ("Službeni glasnik BiH", br. 31/24).

### Član 106.

**(Objavljivanje u službenim glasilima)**

Ovo Uputstvo stupa na snagu danom donošenja, a bit će objavljeno u "Službenom glasniku BiH", "Službenim novinama FBiH", "Službenom glasniku RS", "Službenom glasniku Brčko distrikta BiH" i na internet-stranici Centralne izborne komisije BiH [www.izbori.ba](http://www.izbori.ba).

Broj: 05-1-02-2-727-1/26  
Sarajevo, 06.05.2026. godine

